

& auditores meos, attuli ea, quæ meo tempore communi sententia consentanea erant. Idque non tantum feci, sed publicè in ipso libello pag. 227. 229. professus sum; melius hoc esse putans, quàm si cum Watsonio

— *argutos inter strepere anser olores*

auderem, & quæ recentiores comperta sibi in contrarium affirmarent, cum illis affirmarem, quæ negarent, negarem, licet argumenta illorum non intelligerem, nec propter defectum experientia [ided tamen necessaria quod & ipsi inter se invicem controversis non omnino careant] intelligere possem. Hæc, inquam, cum apertè in Physica professus sim, itaq; ad ea, quæ habet Watsonius pag. 416. 417. contra me, de partibus corporis contentis & fluidis, & aliis, quæ ipsi non placent, sufficit pro responsione, me nec pro meis, nec pro Aristotelicis venditasse.

§. 2. Sed malè scilicet tueor titulum libelli mei, qui *Physicam Aristotelicam* promittit. Respondeo, denominationem fieri à priori, & ut proverbio dicitur, unam hirundinem non facere ver, fortasse nec alteram aut etiam tertiam in hoc quidem negotio. Etsi enim non diffiteor, in una aut altera quæstione ab Aristotele, potissimum ubi experientia propria ~~deserit~~ caruit me recedere; quod quibus de causis faciam, adjicere plerumque soleo. Hoc tamen Aristotelicum esse fatebuntur omnes Aristotelici, I. Quòd principia Aristotelica rectè tradam, ut fatetur ipse Watsonius pag. 339. II. Quòd modo tradendi & demonstrandi Aristotelico utar, ut iterum fatetur Watsonius, pag. 69. III. Quòd ea, in quibus ipsum defero, exigua pars sint eorum, in quibus ipsum sequar. Imò id ipsum, in quo me Watsonius perfidia in Aristotelis interpretatione arguit: quod scilicet nihil demonstrabilium, sive Logicè sive oculariter, ut sunt Anatomica, pro certo affirmem, nisi habeam demonstratum, pro defensione tituli Physicæ Aristotelicæ, ut ego mihi persuadeo, sufficit.

## Quæstio II.

An Sophisticatio sit ita argumentari: *Cerebrum est subtilior pars corporis. E. oritur à subtiliore parte seminis. Item: Cerebrum movetur ad exercitium intellectus. E. est illius Organum.*

§. 1. Ita